

PRIMERA CARTA DEL APOSTOL SAN PABLO A TIMOTEO

Pablo embesa Timoteo je

1 ¹Pablo rei se. Jesucristo chimbaaquiato, Jesucristo chimondo. Dios abe chimondo. Dios ae nanderirō nguiã nandeicua si. Jesucristo chō nandesarō arō nguiã ã. ²Aico ã mbesa ndeje a, Timoteo. Secheē nguire chō ereico nguiã Jesús icua aque. Nyebe aico nguiã seriiri i ndeje co. Dios rei nanderu. Jesucristo rei nandererecua. Sã ũquĩ turã mbei riqui ndeje. Sã ũquĩ ia eã mbei riqui nderese. Sã ũquĩ nembia tuchi.

Emo ndiqui mbia mbaaquiato icuã icuã ã, i Pablo

³Sã acheē ndeje seso mose Macedonia no. “Efeso eico” ae que ndeje, huee bei chō eico. Ae ñee ñooño nguia mbia mbaaquiato icuã icuã hue nae, ũquĩ ñee embutiba. ⁴Ūquĩ siqui bei quia mbia cheē ima nenei nenei mbia je ũquĩ. Ūquĩ siqui bei quia amei cose ndare nenei nenei mbia je ũquĩ no. Ūquĩ ñee embutiba. Ūquĩ ñee icuã icuãte quia ũquĩ. Ūquĩ ñee ño mbia mbiicua icuã nguiã nyue. Ūquĩ ñee nda aba mbaaquiata Dios riĩ. Ūquĩ mose Dios icua aroneate. ⁵Sã hue jenda turã mbei riqui Dios je jē. Sã hue jenda riqui ndua turã mbei jē. Sã hue jenda riqui Dios icua tuchi jē. Nyesecua tuchi nda nyiese cote chã. ⁶Mbia hue jend a mo ndiqui tesarei Dios cheē si ũquĩ. Dios cheē abi abi. Ñee ñooño mbei equia nyue ũquĩ. ⁷Moisés cheē ndese mbia tambaquiato, i raque equia ũquĩ. Moisés cheē icua rocoĩ. Eaquiato rocoĩ. Echeeño ño ñene.

⁸Dios que Moisés mbucheē turã mbia je ra. Mbia icuã je que embucheē nda. Mbia mundua sacua huiicua ndese. ⁹Mbia turã je eã ngue Dios Moisés mbucheē nguiã. Mbia turã je eã ngue Dios ley mii nguiã. Dios cheē mumbasa je chō ngue emii nguiã. Mbia icuã je. Dios quiatoã je. Mbia teã teã je. Usi ucuãyãsa je. Ngu abe ucuãyãsa je. Mbia iquiasa je.

10 Ucheẽ mumbasa je chõ ngue Dios ley mii nguiã. Ae siqui quia emoninisi rese, ùquĩ je. Ae eninisirã saã saã nguia nguesenda mo je, ùquĩ je. Mbia rirõsa je abe no. Ñeeñoõosa je abe no. Ae eicuã icuãte riqui Dios cheẽ turã je, ùquĩ je abe no. Ûquĩ ja je chõ ngue Dios ley mii nguiã. 11 Dios que ñee ucheẽ turã nii seje ra. —Secheẽ esenei senei mbia je, i que Dios seje ra.

Dios que uturã teacuquia seje ra, i Pablo

12 “Coche ñene” ae se quia Jesucristo je co. Ae que seirabo ra. Ae que sembuquirãcuã nda. Ae que semondo ucheẽ nenei nenei sacuã mbia je ra. 13 Seicuã tuchi raque ee nyii. Acheẽ icuã icuã ndei que se quia ee nyii ra. Equiato je abe que seicuã icuã ndiqui nyii ra. Se Jesús icuayã mose. Seaquiãtuã mose. Nyebe Dios ia eãte riqui nguiã serese. Nyebe Dios seicuã mbutiã nguiã sesi cote. 14 Uturã ngue eteacuquia seje ra. Nguiĩ ngue embuchecua seje ra. Nyebe aico nguiã Jesucristo icua co cote. Nyebe aico nguiã nyesequa Jesucristo rese co cote. 15 Jesucristo que tu íbii ra. Mbia icuã mbitirõ sacuã. Emingo bei nonde. Ichõiñoa tuchi chõ ã nde. Sã mbia “ae beite” i ja ã je. Seicuãte raque se quiatu mbia ja si. 16 Dios ia eãte que eriqui serese ra. Erosee nguiatu tuchi que eriqui seje ra. Nyebe mbia riqui nguiã jirandu ja Dios roseĩ nguiatu rese. Sã Dios semingo bei se abe, i chee ra emo abe ñee ñee. Dios roseĩ nguiatu rese jirandu mose. 17 Sã mbia riqui ñee turã mbei Dios je. Ae mii ño mbia rerecua tuchi re. Ae mii ño siqui bei tuchi nguiã co. Ae mii ño ererecua nandemae sayã nde. Ae mii ño mbae icua tuchi nguiã. Amén. 18 Timoteo, seriĩ na tuchi chõ nde re. Dios cheẽ mbuchecuaasa que sembiirandu nderese nyii ra. Nyebe aico nguiã ñee tuchi ndeje ùquĩ ñee na si. Mbae icuã esiquisã quisã mbei chõ nguia Jesús quiato si jẽ. 19 Dios eicua tuchi quia jẽ. Erendua ata atate chĩ nda jẽ. Mbae turã ndese chõ eico. Emo emo ngue ndua chooño mbei quia ra. Mbae turã naa naa ndocoĩ. Nyebe eriqui nguiã siqui icuã icuã mbeite. Nyebe tesarei nguiã Dios cheẽ si cote. 20 Eĩ ngue Himeneo nda. Alejandro abe no. Nyebe ngue amondo nguiã Satanás je. Ndua ndua sacuã. Ñee icuã icuã eã sacuã Dios riĩ.

Sã mbia ñee turã ja Dios je, i Pablo

2 1 ã tacheẽ Jesús quiato ja je: Mbia ja riĩ jẽingo bei ñee Dios je. Ì nda Dios uturã mee mbia je. Gracias jenyee bei quia Dios je mbia ja riĩ. 2 Ae ererecua nae, ùquĩ ja riĩ abe jẽingo ñee mbei Dios je. Dios uturã mee sacuã ee. Ûquĩ mose ra nandeico turã ja cote. Ûquĩ mose ra nandeya bei nandeico cote. Ûquĩ mose ra nandeico tuchi Dios rese cote. 3 Ûquĩ mose ra Dios abe ia tuchi nanderese. Eicuã si mbia rirõsa chõ ae re. 4 Dios mbia rirõ ja sete quia eicuã si co. Dios mbia mbaaquiãtu quiãtu sete quia co no. 5 Dios mii ño siqui nguiã co. Mbia que icha icha jate esi ra. Jesucristo

mii ño siqui nguiã mbite re co. Mbia mbucha sacua Dios rese. Mbia sí chõ ae re. ⁶Jesucristo que mano mbia icua ndiquicharõ sacua nda. Uquĩ ndese que Dios mbia mbiirandu cote ra. ⁷Uquĩ nii ngue Dios seirabo ra. Semondo que judíos eã je embaaquiatu quiatu sacua nda. Uquĩ Dios icua sacua ngue Dios cheẽ asenei senei ee ra. Ae bei. Acheẽ ñooñoa ño nguiã co.

⁸Sã mbia ja riqui ñee mbei Dios je. Sã o mumbate ñee Dios je. Sã eriqui turã ja. Sã paama iã mbei nyue. ⁹Sã cuña abe riqui siqui mingue. Sã eriqui ndua tuchi eã jiri huiirao rese. Uachu riinda hui rese abe. Ua rese abe no. Lujõ rese abe no. ¹⁰Sã eriqui quiatu ndua Dios rese. Sã eriqui mbae turã naa naa mbia je. ¹¹Sã cuña quiriri chõ nguia mbia ñumunua mose. Sã eriqui nyiisaquia turã. Sã eriqui mingue. ¹²Mbia ñumunua nua mose, cuña mbia mbaaquiatu quiatu aroneate. Sã cuña mo ererecua raã naa eã ngu je. Sã eriqui chõ nguia quiriri. ¹³Adán nane nguiatu ngue Dios chao nguiã. Aquere quiatu ngue Eva ao nguiã cote. ¹⁴Adán nane eã ngue Satanás mbiirĩ irĩ nda. Eva rane nguiatu ngue re. Eva rane ngue mbae icua saã nyii ra. ¹⁵Dios ra paama i bei eã cuña je. Nguiirĩ nderequia turã mose. Dios icua mose. Siqui tuchi mose Dios rese. Nyesequa mose mbia rese.

Sã Jesús quiato rerecua siqui turã

3 ¹Acheẽ ñooño eã ño se re. Jesús quiato reaquiato sacua ño taico se, i mose emo, eturãte uquĩ. ²Sã Jesús quiato rerecua riqui siqui turã mbei. Mbia ñee eã sacua ee. Sã ngüinisi mii ño nderequia. Sã eriqui ndua turã turã mbei. Sã earacua tuchi riqui. Sã eriqui mbia isi turã turã mbia mo oso mose echuchúaa. Sã eriqui mbia mbaaquiatu quiatu aracua. ³Sã eriqui quiacuayã. Sã eicua icua eã mbei riqui emo je. Sã eriqui oo tuchiã mbae isiquia rese. Sã eriqui ico mingue. ⁴Sã eriqui mbia uchuchua jenda rerequia turã. Sã eriqui nguiirĩ mbaaquiatu quiatu turã. Aba cheẽ mumbayã sacua. I nda eriirĩ eĩ ñooño eã mbia je. ⁵Nguiirĩ ndea choño mose, Dios quiato reaquiato turã aroneate. ⁶Ae Jesús icua ramote nae, Jesús quiato rerecua aroneate uquĩ. Uquĩ mose ucuasu raã naa arõte. Eicua arõte cote. Sã Satanás abe ucuasu raã naa ñimbiicua nonde no. ⁷Sã Jesús quiato rerecua riqui siqui turã mbei Jesús quiatoã abe je. I nda diablo embiirĩ irĩ eã embiicua. I nda Jesús quiatoã ñee turã mbei eriĩ.

Sã diáconos siqui turã

⁸Diáconos je abe tacheẽ. Sã diáconos abe siqui turã. Sã eriqui ucheẽ mbuchebiã mbae raã nonde. Sã eriqui quiacuayã. Sã eriqui oo tuchiã mbae isiquia rese. ⁹Sã diáconos siqui eã tuchi mbae icua mo ndese. Sã Dios mii ndese quiatu eriqui bei. Sã Dios icua tuchi. ¹⁰Ae ra diácono nae, sã mbia mae na nguiatu erese nyii. Eturã mose mbia je, sã diácono ae

cote. ¹¹Sã diácono ninisi abe riqui siqui turã mbia je. Sã mbia mbucheẽ ñee eã emo nii. Sã eriqui quiacuayã. Sã eriqui ucheẽ mbuchebiã mbae raã nonde. ¹²Sã diácono ngüinisi mii ño nderequia. Sã eriqui nguiirĩ nderequia turã. Uchuchua jenda ja abe no. ¹³Diáconos mbae raã turã turã mbei mose, mbia ra eicua tuchi cote. Dios abe ra embuquirãcuã tuchi Jesucristo renei nenei sacuã mbia je.

Ae Dios saã nande je, ñquĩ aba icua ja aroneate raque

¹⁴Seso jeise rete raque nderea. Seso eã moi ño aico nguiã co mbesa ndeje a. ¹⁵Nde Jesús quiato rerecuarã irabo aquiatu sacuã ño aico nguiã ã mbesa ndeje a. Iglesia jenda rerecuã irabo sacuã. Dios reco mbae rei iglesia. Iglesia quia rei Dios cheẽ nderequia tuchi mbia ja je. ¹⁶Ae Dios saã nguiã nande je nae, ñquĩ aba icua ja aroneate raque:

Dios que tu mbiarã íbii ra. Jesús, i equia ee.

“Eturã tuchi” i que Espíritu Turã erĩi nda.

Angeles abe que mae erese ra.

Ae Jesús quiato nae, ñquĩ ngue esenei senei mbia ataque je ra.

Mbia manguere chooñoa jenda ja que eicua ra.

Aquere que Dios equeraobe ibate cote ra.

Mbia ra hui hui Dios cheẽ si

4 ¹Espíritu Turã ndiqui ñee co: Mbae ua ja nonde ra mbia hui hui tuchi Dios si. Aba mbiirĩ irisa rese ra mbia riqui tuchi. Ñquĩ nda mbia mbaaquiato icuã icuã aba checuayã icuã na. ²Ae uturã saã saã nguiã nae, ñquĩ ndui rui ra mbia riqui. Ae ñee ñooño nguiã nae, ñquĩ ndui rui ra mbia riqui no. Ñquĩ siqui beite mbae icuã ndese ñquĩ. Nyebe eriqui nguiã mbae turã icuayãte chee cote. ³Ñquĩ nda mbia mbaaquiato icuã icuã. Jeninisirã nda jendecoã. Jendurã abe ra jendecoã no, i ra equia ñee mbia je. —Mbae ra jëu chooñocheẽ jë, i ra equia mbia mbaaquiato icuã icuã. Dios mbae chao ja raque mbia chiurã. —Sã sequiatio mbae ja u, gracias ire seje, i que Dios ra. ⁴Dios chiao mbae turã ja. Mbae nandeisi teã teã eã ño nguiã echiao. Mbae nandeu turã ja chõ nguiã. Gracias nande bei chõ nguiã Dios je. ⁵Dios cheẽ nguire mbae turã ja riqui nandechiurã ã. Nande “gracias” i mose Dios je, mbae turã ja chõ eriqui nguiã nande je.

Jesús quiato rerecuã turã

⁶Ñ secheẽ esenei senei mbei quia Dios quiato je, Timoteo. Nde mbia mbaaquiato turã turã mose. Dios rimba turã tuchi ra nde cote. Jesús cheẽ ndui ra ereico tuchi cote. Dios ra ereicua tuchi cote. Sã ereico beite erese co no. ⁷Mbia cheẽ ñooño je cheẽ ndese ra erechiisaquiachẽ jë. Echimbirãcuã tuchi quiato quia siqui Dios rese jë. ⁸Nanderete quirãcuã

mose, eturãte raque. Nandeico mose Jesús rese, ùquĩ nguiatu eturã tuchi nanderete quirãcuã si re. Aachõ eã nandeico Jesús rese. Ibate abe quiatu nandeico erese. ⁹Acheẽ ñoño eã ño se re. Sã mbia “ae beite” i ja secheẽ je. Dios cheẽ ño ñene. ¹⁰Dios cheẽ ñi ño ureico nguiã quicoi coi ã. Dios cheẽ ñi ño ureico nguiã ñimbirãcuã mbae ja rese ã. Dios reco quiatu ureicuate nguiã ã. Ae que mano mbia ja je ra. Ae eicuate quia nae, ùquĩ nda emingo bei.

¹¹Ã esenei senei mbei quia mbia je. Mbia Dios cheẽ mumbayã sacuã. ¹²Sã mbia ndecheẽ andu turã. Amei eã ndaque nde. Mbae turã esaã saã nguia Jesús quiato résaa. Ûquĩ siqui turã sacuã nde rã si. Echeẽ turã mbei quia mbia je. Eico turã mbei quia mbae turã ndese. Echesequa tuchi quia mbia rese. Dios eicua tuchi quia. Mbae icuã ndese ra eremae mae jirichĩ. ¹³Mbia embaaquiato quiatu bei quia seso mose chee nderea. Dios cheẽ esenei senei mbei quia leer i ee. ¹⁴Jesús quiato rerecua o chono mose ndearõ, aque mose que Dios nembaaracua tuchi ra. —Ã esaã, i que ndeje ra. Ûquĩ si ra eretesareichĩ. ¹⁵Ûquĩ ndese eico bei. Endua ndua bei quia erese. Ûquĩ mose ra Dios ereicua i i tuchi. Mbia ra jirandu ja nderese. ¹⁶Emae ño nguia nde ae ndechiese. Echicuasẽ cuasẽ ño nguia mbae icuã si. Ae eresenei senei nguia mbia je Dios cheẽ nae, ùquĩ emumbayã ño nguia nde abe. Ûquĩ mose ra Dios nemingo turã tuchi. Ndecheẽ andusa abe ra emingo turã tuchi.

Jesús quiato siqui turã sacuã

5 ¹Erecheẽ icuã icuãchĩ nda amei je nde embaaquiato quiatu mose jẽ. Amei embaaquiato turã turã ño nguia jẽ. Nderu esaã ño nguia siqui turã ee. Ndenongue rã ño eico mbia yasu je no.

²Ndesi esaã ño nguia ari je jẽ. Ndenongue esaã ño nguia ubichõ nyucuaaque rese jẽ. Endua icuã icuã eã ño nguia eriĩ jẽ. ³Eru cheecha mo mbae eã mose, sã Jesús quiato riqui mbae mo mee mee ee. ⁴Eriirĩ tiarõ mose, sã aque chõ mbae mee mee mbei quia usi je. Eriirĩ nducucha mose, sã aque chõ mbae mee mee ee no. Ngu abe je. Umumbebosa je. Ûquĩ Dios bite. ⁵Sã eru cheecha mo ae riqui no. Sã embae eãte riqui no. Ae ndua ndua bei mose Dios rese, ñee mbei mose Dios je, sã Dios quiato riqui mbae mee mee mbei ee. ⁶Ae ebite nae, ùquĩ ndese achõ eru cheecha mo siqui mose, eicuate ùquĩ. Eraaque rã ño aque riqui nguiã. Ereco siqui raque. ⁷Ã esenei senei nguia mbia Jesús quiato hue jenda je. Ì nda mbia ñee icuã eã eriĩ. ⁸Emo ndua eã mose usi rese, ngu abe rese, eicuate ùquĩ. Mbae mee mee eã mose ee, eicuate ùquĩ. Ûquĩ siqui ãte quia Dios rese ùquĩ. Eicua tuchi chõ ùquĩ Dios quiatoã si re.

⁹Ari eru cheecha je inscribir jenyẽ rã mámbi. Ae sesenta años eãte nae, ùquĩ je inscribir jenyẽ eã. Ae eru ata nyii nae, ùquĩ je inscribir jenyẽ eã no. Ae eru miĩ nyii nae, ùquĩ miĩ je chõ inscribir jenyẽ. ¹⁰Ae ari

turã aba chiicuate nae, ũquĩ achõ je chõ inscribir jenyete. Ae ari nguiirĩ mbutiarõ turã mbeite quia nae. Ae ari mbia isi turãte quia uchuchúaa nae. Ae ari mbae turã saã saã mbeite quia Jesús quiato je nae. Ae ari erasi teaquiato turã mbeite quia nae. Ae ari siqui beite quia mbae turã ndese nae. Ũquĩ ari je chõ inscribir jenyete. ¹¹Eru cheecha ari eã mose, ũquĩ je inscribir jenyete eã. Ũquĩ nyao arondete Cristo si. Ae ebite, ũquĩ achõ ndese ndua mose. —Serurã mo tateabe, i ra cote. ¹²Ũquĩ mose ra Dios paama i ee. Ucheẽ mbuchebe chõ nguiã ngu rea mose cote. ¹³Eru cheecha ari eã mose, siqui eã arõte mbae mo ndese. Tuchua embuchesea sea choõno arõte. Mbia mbucheẽ ñee ñooño arõte emo nii. Uchuru rerequia choõno eã arõte. ¹⁴Nyebe aico nguiã ñee eru cheecha, ae ari eãte, ũquĩ je. Sã ngurã mo ndea. Sã tiirĩ. Sã eriqui mbae turã naa naa mbei uchuchúaa. Ũquĩ mose ra Jesús quiatoã ñee eã ee cote. ¹⁵Emo emo ngue nyao Dios si cote ra. Satanás ndese eriqui ã cote. ¹⁶Sã Jesús quiato riqui mbae mee mee uchari eru cheecha je. Usi abe je eru cheecha mose. Iglesia mbae mee mee eã sacua ee. Ae eru cheecha eriiriate nae, ũquĩ je quiato iglesia mbae mee mee.

¹⁷Jesús quiato rerecua mbae saã turã turã mbei mose, sã mbia ia tuchi riqui erese. Dios cheẽ nenei nenei turã mose, sã Jesús quiato riqui mbae mee mee mbei ee. ¹⁸Sã embesa ji riqui ñee no: “Emo nimba ticuasú mbae usi raã mose, echuru ra jenyatichĩ mbae mo je jẽ. Sã ae ae si quia quiaru quiaru”, i que embesa ji ra. “Ae quieĩ quieĩ quia emo je nae, sã echa mbae isiquia mo mee ee”, i que embesa ji ra. ¹⁹—Jesús quiato rerecua que mbae icuã saã nda, i mose emo, echeẽ nda jeñanduchĩ, ae mii ñee mose. Nyeremo ñee mose, ũquĩ ñee ñooñoa arõte cote. ²⁰Jesús quiato rerecua mo siqui siqui bei mose mbae icuã ndese, echeẽ asi asi ee Jesús quiato ataque résa. ĩ nda ũquĩ abe siquiche mbae icuã naa naa eã. ²¹Eĩ ere chõ Jesús quiato rerecua je, siqui mose mbae icuã ndese. Ndequiatote raque. Echeẽ asi ee. Aico ñee ndeje Diosa a. Jesucristo sa abe no. Angeles Dios rimba sa abe no. ²²Jesús quiato rerecuarã nda eremii jeichĩ jẽ. Emae nguiatu turã na erese nyii. Emii jei mose, eicuã arõte emo mose. —Eremii jeichĩ ngue nyii ra, i ra mbia ñee ndeje cote. Mbae turã ndese chõ eico nde abe.

²³I achõ nda erembeichĩ jẽ. Uva rique rasi ñetẽ abe embei mbei quia nderie rasi mose jẽ.

²⁴Emo emo nyisaã mbae icuã nyecuate riqui nande je ã. Emo nyisaã icuã ndese quia nandeico nguiã mae ãte namo. Dios eicuã mbasi mose, aque mose ramo nda nandemae ũquĩ nyisaã icuã ndese cote. ²⁵Eĩ si chõ mbia chisaã turã no nde. Emo emo nyisaã mbae turã nyecuate riqui nande je ã. Emo nyisaã turã ndese quia nandeico nguiã mae ãte raque ã no. Echisaã turã nda nyecua ja chee nande je cote.

6 ¹Ae Jesús quiato ererecua rimba mo nae, sã ũquĩ ndiqui nguerecua cheẽ mumbayã tuchi. Sã eriqui turã nguerecua je. Eĩ mose ra mbia

ñee icuã eã Dios cheẽ nii cote. ²Timoteo, mbia rimba embaaquiato quiatu quia. ã echeẽ ee. —Jenderecua Jesús quiato mose, echeẽ jemumbayã ño nguia mbae raã turã turã ee. “Jesús rimba ja chõ nande re” jenyechĩ nda jenderecua ucuãyã cuãyã jẽ. Jenderecua Jesús quiato mose, mbae jẽsaã turã tuchi quiatu quia ee. Jẽingo turã tuchi chõ nguia ee, ere ererecua rimba je ñee.

Nandendua tuchiã jiri quiatu quia mbae isiquia rese

³Ã ndei Jesucristo cheẽ tuchi ã. Emo siqui mose ã ndui, siqui turã nda Dios rã si. Emo mbia mbaaquiato quiatu mose ã abi, Dios cheẽ ndui eã ño ùquĩ ndiqui nguia. ⁴Ucuasu raã naa ño nguia ùquĩ. Ñee tuchi beite equia ùquĩ. Eaquiato rocoĩ. Mbia mbiçuã icuãte equia ùquĩ. Mbia mbucheẽ icuã icuãte equia nyue ùquĩ. Mbia mumae icuã icuãte equia nyiese ùquĩ. ⁵Ndua icuã icuã mbeite equia ñee turã ndocoĩ ùquĩ. Eicuã icuã mbeite riqui emo je ùquĩ. —Mbia ra mbae isiquia mee seje, se Dios cheẽ nenei nenei mose ee, i beite equia ùquĩ. Ùquĩ ndese eicoã tuchi, Timoteo. ⁶Nandeico mose Dios rui, ae ae ra nandembia nandembae mii ndese. ⁷Mbae mo ngue nanderuãte nandechaacuquia mose ra. Eĩ nande si ra nandemano mose mbae mo nderao eã no. ⁸Nandechiurã nandereco mose, nandeirao abe nandereco mose, nandeya chõ nandeico ùquĩ ndese. ⁹Ae “mbaecha tuchi ra se” i bei quia ndua ndua, ùquĩ nda nimbirãcuã eã mbae icuã si. Mbae icuã tã i mose ee, mbae icuã nda esaã jei. Mbae Isiquia quiatu ebi tuchite riqui nguia. Echioseĩ oseĩ icuã nda equerao chee tata cuásuu. ¹⁰Ae ndua beite quia mbae isiquia rese, ùquĩ mbae icuã saã ja arondete. Emo emo ndiqui ndua tuchi mbae isiquia rese ã. Nyebe eriqui nguia hui Dios si ã. Nyebe eya eã ndasi tuchi riqui nguia ã.

Dios eicua tuchi, i Pablo ñee Timoteo je

¹¹Eĩ erechĩ nda nde, Timoteo. Dios rimba tuchi chõ nde re. Mbae turã ndese bei eico. Dios rã mbei chõ eico. Dios eicua bei chõ nguia. Echesequa bei chõ nguia mbia rese. Eico mingue chõ nguia. Ndecuasu ra eresaã saãchĩ nguia jẽ. ¹²Echimbirãcuã tuchi quiatu quia Dios cheẽ ndese jẽ. Aba mingo beisa rese quia eico tuchi jẽ. Ae quia ngue ndeirabo nguia nyii. Sã erecheẽ turãte mbia résaa nyii no. —Dios riqui semingo beite co, ere que equia nyii. Ùquĩ ndese bei chõ eico. ¹³Dios ae chõ mbae mingo ja nguia co. Erésaa tacheẽ ndeje. Jesucristo résaa abe tacheẽ ndeje. Sã Jesucristo siquicheã ñee Poncio Pilato je no. ¹⁴Ae rii Dios ñee ndeje nae, ùquĩ emumbayã ja chõ nguia eraã turã. Jesucristo tu mose chee eico echeẽ mumbayã mbei. Ì nda emo ñee eã ndeje. ¹⁵Dios quia rei equirãcuã tuchi mbia mo si. Ae quia ererecua tuchi mbia mo si re. Emo mose ra Dios “Jesucristo tamondo íbii mbia rea” i. Aque mose ra Jesucristo nyecua tuchi mbia je. ¹⁶Dios mii nda manoa. Ae mii ño siqui bei nguia nyaashĩ

na co. Mbia mo nda esiichã eã. Mbia mo mae eãte erese emo mose. Emo nda mae eã mbei erese. Sã mbia ñee turã mbei quia eriĩ. Sã eriqui ñee turã mbei equirãcuã nii. Amén.

¹⁷Ae mbaechate nae, ùquĩ je echeẽ. Sã ucuasu raã naa eã. Sã eya siquĩã umbae mii ndese. Embae ra ua emo mose. Sã Dios rese quiatu eya riqui. Ae mii ño mbae mee nguiã nande je. ¹⁸Echeẽ mbaecha je. —Mbae turã jësaã saã mbei quia jembae je jẽ. Jëingo turã jiri quia mbaecha reã je. Abei chiãte ra jëingochĩ jẽ, ere mbaecha mbaaquiato quiatu. ¹⁹Ùquĩ naa naa mose ra Dios mbae mee tuchi ee ibate. Ùquĩ naa naa mose ra siqui turã tuchi no.

Pablo ñee hui bei Timoteo je

²⁰Timoteo, ae riĩ Dios ñee ndeje, ùquĩ emumbayã mbei quia. Mbia ñee ñooño mose nyue, nde abe ra erecheẽchĩ. Ùquĩ ñee aba mundua turã eã ño nguiã. Uaquiato raã naasa chõ ùquĩ nde. ²¹Dios cheẽ abi chõ eriqui nguiã ùquĩ naa naa ùuuuuu uuquĩ. Dios icuasa reã ño ùquĩ nde. Sã Dios turã ndiqui bei ndeje. mén.